



AUGUST 2024

VOLUME 64 | NO. 08

Christian Thukizakna



Namsung Kipumkhatna

15 INDEPENDENCE DAY

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndouliau

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

LAKMAN:

Kum khat ₹ 150.00

Dak ah ₹ 200.00

Bu khat ₹ 15.00

CONTENTS

1. EDITORIAL	: 01
2. NAM SUNG KIPUMKHATNA	: 03
3. NA THUAKNA A THAWN IN BEISAK KEN!	: 07
4. TANCHINHOIH PUANZAKNA	: 11
5. SAMSON IN A MISSION PATHIAN IN SEP DING A CHIH SEMKHA NASA HIA?	: 14
6. BIBLE STUDY	: 16
7. GAMMIAL AW	: 22
8. DORCAS CORNER	: 26
9. YOUTH CORNER	: 29
10. CHILDREN'S CORNER	: 31
11. EBC INNSUNG THU	: 33
12. THU TUAMTUAM	: 35
13. DOTNA LEH DAWNNA	: 36
14. ORDAIN SUNNA	: 37
15. KIPATHU GENNA LEH THUMNA DINGTE	: 39

Thusuah ding piakna:

Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan a hikim kholkei.
Thusuahte'n amau thusuah ah moh a
pawtek ding uh.*

NAM SUNG KIPUMKHATNA

“Kua gitlough leng gilou in thuk kei un. Mi tengteng muh in thil kilawm ngaihtuah un. ¹⁸Ahihtheih liai leh noumau lam bek, mi tengteng toh kituak in om un (Rom 12:17).”

Kumbul a pan ‘kipumkhatna’ thu i na suitou ua, tuin kha 8na bang i tungta hi. Tuni chianga a i kikapna sung ah Bible in kipumkhatna agen pen Itna leh ngaihdamna a kibulphuh ahi chih a chiang hi. Tua pen Pathian in Jesu Khrist sihna leh thohnawna tungtawn a athawn a a hon ngaihdamna ah kimu hi. Hiai kipumkhatna ding a Pathian lampi sial tuh inkuan sung, khotang leh nam sung kipumkhatna ding a alampi omsun ahi hi. Kipumkhatna pen atuama neihtheih ahikeia ki-itna leh kingaihdamna a om peuh leh kipumkhatna hong gah khemai ding ahi. Himahleh, khovel in hiai Pathian lampisial zuilou in lampi tuamtuam sial mahleh a kuitung kipumkhatna piang theilou ding hi.

Kipumkhatna a om theihna ding in ki-ittuahna apoimoh masapen ahi. Mihing pian ken a itna chikhat a om a Bible a kigen Kha Siangthou tungtawn a itna chituam khat om nawn hi. Hiai pianken a itna i chih pen ganhingte nasan in leng a nei uhi. Mahni group hiam mahni kinaihpichte itna chikhat om hi. Hiai mihing pianken a hoihna kepbit ahih a gamsung dan hoihtak toh etkolna mun ah ginglou mite nasan bangtan hiam ah kipumkhat thei hi. Himahleh hiai pianken itna i chih pen gamgi nei itna ahi, angmasialna leh duh-amna toh a tonkhawm sek ziakin kipumkhatna taktak a tun zou ngeikei hi.

Bible in a gen itna chikhat om nawn hi. Hiai bel mihing a omsa hilou Jesu neite sung a Kha Siangthou in a bawlkhiak itna ahi. Hiai itna bel gamgi neilou, chi leh zat paipel itna ahi. Hiai itna pen kingaihniamna, nunnemna, thunuilutna, dohzohna, leh ngaihdamna toh tonkhawm gige ahi. Tua itna thu Bible in hichiin agen hi: Itna in a invengte a hihse ngeikei a; huaiziakin itna zaw dan zuihkimna ahi (Rom 13:10) chi in. Ki-itlou pi a kipumkhatna thu gengen pen zaw thil hitheilou ahi.

Kipumkhatna i lunggulh taktak leh i inkuan sung leh society ah ki-itna aom hiam chih buaipih masak kul hi. Tulaitaka i buaina uh 'kipumkhatna' bawltu ding ki-itna i laka omlou buaipih i hi uhi. Ki-itna a omlouh ziak in kihuatna a om a, kideihsakna a omlouh ziaakin mudahna a om a, mahni dik kisakna aom ziak in kingaihdamna a om theikei hi. Bible in itna in adohzou a, amigi a; itna in ahaza kei a, akisathei sam kei, itna aki-uangsak kei a, ahuham sam kei. Amah thu a chitentun kei a, a hehbaih kei, hehsa in a-omden sam kei (1Kor 13:4,5) achi hi. Dik kisa ngen, pil kisa ngen, hoih kisa ngen tenkhawmna ah thilhoih lamet ding tampi omlou ding hi.

I lungput uh akilatna dang khat social media i zatdan uh ahi. Hiai ah i pichin nailouhdan uh leng amuhtheih mahmah hi. Hiai social media omlou hileh kongkhat ah i nam leh i gam tuasang in chidam zaw leh kilawm phial hi. Mi khat in thuhoih khat gelh leh leng demsiatsak teitei, mi nasep teng demdem a sepsawm le hituanlou zel. Thutak a ding ngam thilhoih deih chihdia lah hihna leng taklang ngamlou zel. Whassaap Guerrilla tactics zang a i gam kibawl ngeilou ding hi. Thumal zatte khawng en leng a uang thei pen (superlatives adj.) akhauh thei tawp, asethei tawp kizatkhum, agah chih le kithei zui tuanlou, lungput taklatna tuh hipeuhmah hi. Kongkhat ah mihinpihte tung a khauhpai mahmah i bat laiin i society leh insung hihsepente laka khat zu leh khamtheih khawng kipomzam mahmah zel hi. High school leh college naupangte susia drug polutte leh zuakte zalen (free) takin a gamtang thei gige uhi. Hiai social issue te poi sahetlou nam bang suak ding ahia? Toupa Jesu'n tuh hichiin achi hi: Agam leh ama diktatna zong masa un, huchi in hiaite tengteng ahon piak behlap ding hi (Mat 7:33) chiin.

Namsung kipumkhatna dingin sawm thoh hiam duhthusam gen thoh lel in piang ngeilou ding hi. Sum a kizol thoh in leng piang lou ding, kivau thoh a leng pianglou ding, midangte gensiat in leng kipumkhatna piangsaklou ding hi. Ahihleh bang loh ding, Bible in agen i zuih masak ngai hi "*Ahihtheih liai leh noumau lam bek, mi tengteng toh kituak in om un*" (Rom 12:17) chih ahi. Kipumkhatna kichi midang pat ding hilou in nang leh kei pat ding ahi. Muhdahna leh huatnate paikhia a thukkik sawmlou a lemna zong a delh a delh mite lak kia ah kilemna leh kipumkhatna hong piang ding hi (Sam 34:14). ■

NAM SUNG KIPUMKCHATNA

- Rev Paukhanmang Guite, *Hebron Veng*

“A sawm kei un mi nih a paikhawm thei ding ua hia?” (Amos 3:3).

Thupatna: Hiai i tangtel thu Jawlnei Amos in a gen lai in Israel nam 12te gam nih in kikhenta uhi. Judah gam kumpipa Uziah ahi a, Israel gam kumpipa Jeroboam II ahi. Hiai gam nih, Israel nam sawmlenihte'n Pathian taisan in, milim pathiante mai a kithoih in, Pathian zakdah hinkho thanguai leh buahgawp in khosa uhi. Pathian in amah lama kiknawn dingin Jawlneite zang in samsam mahleh, kuaman ngeingaihlu in, a maban omsun Pathian thangpaihna mulkimhuai tuah ding hita ahi, chiin Jawlnei in gen hi.

1. Israel nam Sawmlenihte hihna leh dinmun: Jawlnei in, Pathian theihsak bangin, hangsantak leh kichiantak in Israel nam sawmlenihte hihna leh dinmun ahi bangin taklang hi -

- Toupa dan deihlu in, a zui kei uhi. A Pate un a zuih uh pathian dangte'n a Tate uh Jehovah apan lampialsak in pimang in om uhi (2:4).
- Midiktatte leh mizawngte' haksatna hunlemtang a la in, khedap buh khat toh a manphatdan uh kibang lel a bawl in, a nesia uhi (2:6). Mizawng khat in tawmchik a leibat, khedap buh khat man toh kikim ding lel, a dit zohlouh ziak a, a kum

a sim suak leh sal dia zang in, a tha leh hunte uh kineksiatna uang mahmah hi.

- Migentheite leh mizawngte nelhsiah a, a hamphatna tanding teng nangawn uh deihgoh tuntun in lok uhi (2:7a). Thunei zawte'n migentheite hamphatna tan ding omsunte suhsak guigui uhi.
- Numei-pasal kal thangtatna ah Pa leh a Ta kibual khawm uhi (2:7b).
- Nazarith mite (Toupa'n a nna sem dia a sehte) thupisim lou a ngaisang lou in, Uain dawnte bang lel a koih in musit in simmoh uhi (2:12a).

- Jawlneite' thutak leh dik gente bangmah a simsak lou in, kamsim ding leh amau zaknop leh kipahpih thute gen zaw di'n vauhilh zomah uhi (2:12b).

Israel Nam sawmlenih sung hihna leh dinmun hiaibang ahi. Azawng leh ahau kal; apil leh apillou kal; heutu leh nautang kal leh vaihawmtu leh mipite kal ah kideidanna, kinelhsiahna leh kineksiatna a talua chih omlou khop a muhtheih in om hi. Michih amau apilpen leh hoih pen a kikoih chiat in, amau ngaihdan leh utdan a khosa in, koimah ah kipumkhatna muh ding omlou hi. Pathian taisan in, amau hoihsak bang in hiamgamtak in gamtang chiat uhi. Hiaibang omdan leh hinkhua in Pathian nam telte lak ah kipumkhatna leh kilemna omsak theilou ahi, Jawlnei in chi hi.

Israel nam sawmlenih sung a mite omdan bangin, tulai saptuam leh nam sungte ah Pathian thu mang nuamlou a, Pathiantaihsatnaziakin, mimal angsungkhualna a thupi pen a tawisang in om a, a uanglua chih omlou thanguaina hinkhua, kineksiatna,

kinelhsiahna, thuneihna akhengval a zatna leh itna pianpih nangawn tawpsanna hinkhua in i gam tuamta hi (2 Tm.3:3). Hiaibang dinmun sang a siatzawk chih om thei nawnlou ding khop dinmun ah i khosata uhi. Pathian saptuam kepna leh a gamzatna nna sepna a lungsim kipumkhat a sem dia lamet ihih kia hilou in, i pulepate apan Pathian hon luahsak gam leh nam kepna, etkolna leh humbitna a lungsim kigawmkhawm a, kalkhat suankhawm dia lamet ihi hi. Tuabang lungput leh kipumkhatna lunggulh lou ki-omlou bang napiin, mimal hiin pawl tuamtuamte hitaleh, paikhawm, kalsuan khawm leh lungsim kipumkhat a khosakkhawm sawm mawngmawng omlou hilehang kilawm in i khosa hi.

Aneu alian kuapeuh Pathian gamlat semsem a khosa in, ahai pen leh kizenlou pente saptuam leh khotang heutu leh makai a neikha hileng kilawm khop a, kithalawp tak a dem theih dem moh a kidem tuah in, uiek khu i kibangsak uhi. Aneu alian in, kei sang a pilzaw khovel ah omkei chihbawl in, pilpen kisa chiat in, midang

kuamah thulaktak sa lou in, kidem leh kigensiat i sun nitum nasep a nei hileng kilawm khop in i khosa a, i dinmun nak lungzinhuai mahmah ahi, chih in genphaban lou lai hi.

2. Thumang lou a Pathian lam naih nuamlou Israel thuak dingte: Pathian nam tel Israel, hiaibang dinmun niam leh zahlakhuaitak a khosa a, Pathian lam a naih utlough ziak in, atung a Pathian thangpaihna, buakkiak a om dingte Jawlnei tungtawn in hichiin genkiak in om hi -

- Judah tung ah mei ka sawl ding a, Jerusalem khaw kumpipa innte a kangkhin ding (2:5).
- Kangtalai a buhphal sawnsip bang in Israel, a mun ah ka sawnsip ding (2:13).
- Mi taihatte hatna a mang ding (2:14a).
- Mi hat in a tha a suah thei sam kei ding (2:14b).
- Mi hat mahmah leng a kihumbit theikei ding (2:14c).
- Thalpeu zang mi leng a ding thei sam kei ding (2:15a).
- Paihat thei mi leng a kihumbit theikei ding (2:15b).

- Sakol tungtuang mi leng a kihumbit theikei ding (2:15c).
- Mi thilhihthei mahmah lak a mihangsan leng vuaktang in a taimang ding (2:16).

Lungtang phengphi leh sapkik lah Israel in a tuah ding Pathian thangpaihna mulkimhuai petmah ding hi. A vanzat dia milimbua melmate zang in, Israel dou sak in a zou sak ding a, a khopite leh tenna innte uh mei a hal in vaivut suaksak ding hi. Pathian ompihna leh gupna ziak a nidang a galhat mahmah a, vanzat leh galvan hoihtaktak nei a melmate tunga vualzou gige, tu'n melmate lak a zahlak leh vuallel in, amaute kihtakna toh hinna humbit ding in, a inn leh khopite apan savuak in taikhe ding hi, chiin Jawlnei in gen hi. Hiai vaukholhna atak a Israel in tamveipi tuak in, melmate nuai ah genteitak in khosa mun mahmah hi.

Thumanlounhna lungtang sakgawp leh phengphi toh khosa tulai gingtute, Pathian sapna a za lou leh thei lou bang a omte'n, Pathian thangpaihna mulkimhuai bangzahvei i thuakkhata a? I thuaksate hun mahmahta sa lou lai i hi hiam?

Bangzahvei thuak lailai ding i hi ua? Maban a mulkimhuai sem thuak nawn lou di'n mimal, saptuam leh nam, kivelthak chiat ding in i kichial hi.

3. Pathian thangpaihna pumpelhna ding lampi omsun:

Israel adia Pathian thangpaihna pumpelhna ding lampi om sun "Aw Israel, na Pathian tuak dingin mansa in om in" (4:12b), chi a vauhilhna limsak ding ahi. Mansa a omna ding in, "Toupa zong unla, na hing ding uh" (5:5a,6a), chih ahi. Toupa zong a, amah lam a kiknawna lou a Israel adia damna ding lampi dang bangmah omlou hi. Pathian in Amahkianga kikdia a lamet dan hiaibang ahi, "Kingaihniamna toh thum a, omdan giloute lehngatsan/tawpsan a, Toupa zon ding" chih ahi. Toupa zong a, akiang a a kiknawn hunhun in Pathian in hihdam pahpah a, a khelhnate ngaidam in, saltanna apan suaktasak in, a gam uh damsak zel hi (2 Kronikil.7:14-15).

Israel Pathian, eite Pathian, a mite a itdan leh a deihdan kidang ngeilou, Jehovah ahi. Israel a lamet bangbang tulai gingtute ahonlamenhi. Tuhun a mimal, khotang, saptuam leh

gamlenam, gingloumite sanga dinmun niamzaw leh segawp a I khosakna a kipan hihdamna ding lampi omsun I Pathian zong a, amah kianga kiknawn ahi. Hiai lou lampi dang himhim omlou hi. Mimal hiin saptuam hileh, Pathian zonga amah lam a kiknawn masasa, hihdam a om masa ahi dia, michih Toupa lama i kiknawn vek chiang in, Inkuan chidam, khotang chidam, saptuam chidam leh gamlenam chidam i hiding hi.

Thukhitna: Pathian ngaihdamna tang a, hihdam a om mite lakah kingaihdamtuahna, kilemna, ei sang a midangte hoihzaw a muhna leh midangte toh kituahna hong om ding hi. Michih aneu alian, heutu leh nautang, khalam leh salam, azawng leh ahau kalah kipumkhatna leh kiitna hong lian ding hi. Tuplengim kibang a kalsuan khawm in, gamlenam adia panlakhawm in, Pathian gamzatna nna i semkhawm dia, Pathian adia vualzawl tak leh pahtak saptuam leh nam ihi ding hi. Hiaibang dinmun a khosa thei di'n Toupa'n michih hon huh in, hon tokthou chiat hen aw, chih i lunggulh leh thumna ahi. ■

NA THUAKNA A THAWN IN BEISAK KEN!

- Rev V Thangkhanmuan, EBC, Youth Coordinator

Hiai khovel a i thiltuahte leh phutkhak jelte leh thiltung zelte pen aziak gen theilou/kimlou ding i hihman a, gen leng i sawm kei a, gingtu i hihna ah haksatna i thuakte bangchibang a maituah a, bangchibang a dawng ding i hihiam chih lamah i lungsim koih zual leng uthuai i sa zaw hi. Manipur gal buaina ziak in it leh ngaih tampi, neih leh lam tampi i tan ua, hiai bang haksatna leh lungkhamna i tuahlai in bangchiin i ngaihtuahna hon sukha hiam? Hinkhua ah haksatna ei thuakkhop chiat in i tuakvek a, tuabang hun in **'Toupa bang ziak a?'** chihlough theihlough leng hi ahi.

Huchibang hinkhua a haksatna i tuah hun in Toupa'n hon lehngatsan ahi diam? Ahihkeileh, Pathian, hehpihna a dim, itna Pathian i chih uh zuau ahi diam? Laisiangthou in, *"Noulam a ka lungsim putdan lah ka thei ngal a, na hun nanung tawp ua lametna hon peding in thil hoihlou na siatna ding uh hihlou in hoihna ngaihtuah ka hi"* (Jeremia 29:11) ana chi ahi. Toupa'n ahon tuahsak haksatna leh lungngaihmate i siatna ding ahi kei himhim a, hon hihnat sawm leng ahi sam kei, himahleh, i hoihna ding a ngaihtuah ziak hizaw ahi chih theisiam leng a puak a nuam in zangkhai zaw diam hon chisak hi.

Ahi a, hichibang dinmun mi'n a tuah lai ua khamuanna thugen/thugelh kichi thil haksa lua in i koih ngei kholkei hi. Bangziak a haksalou eita i chihleh, 'Nang na tuak kei a hi', chih mi tamzaw dawnna hisek ahi. Himahleh, hichiin i ngaihtuah ahi, Doctor in kuahiam damlou kiang ah nek ding damdawi agelhsakte aman anek sa ngen gelhsak hi tuanlou ahi. Naupang kikap ding lin mahmah tuh kap ekek mahleh adamna ding ahi chih a theih ziak un Doctor leh nursete'n naupang utlou in kap mahleh, a kaap lou tuan kei uh ahi. Pathian, athuchiam a zuau ngeilou Pa'n gingtute a ding a theih a, haksatna i thuak hun a i khamuanna ding hon chiam

om ahihman in hangsan tak a gen sawm hi zaw i hi.

Haksatna thuak a nuamsa a lam ding chi a kihanthawn sawm i hikei a, Toupa'n i hinkhua ah tup nei a, i haksatna tungtawna hon sinsaknop om ahihman in, huchi bang haksatna i thuakte athawn in beisak kei leng uthuai sa ihi. Bang ziak a gingtu Pathian nei i hih nung a haksatna tuak lailai i hia? chih dawna Job hinkhua pansan in pe leng i chi ahi.

TOUPA' LEMSAK AHI: Toupa'n i haksatna zang a hon hihnat sawm ahi ngei kei a, ei a dinga hoih agelsa tangtunna ding a vanzat ahi chih Jeremia 29:11 ah i muta ahi. *“Uz gam ah Pathian bia a, a tung a gin-om mahmah mi khat a-om a, amin Job ahi. Amah bel mi hoih, hoihlou bang hiam ahikhak ding kiveng gige mi ahi. Aman tapa sagih leh tanu thum a nei a, huan belam sang sagih, sangawngsau sang thum, bawng hakkol pua za-nga a nei hi. Sila leng tampi mahmah a nei a, suahlam gam a mi hausapen ahi”* (Job 1:1-3).

Mi diktat leh Pathian a ding a mi gin-om Job in bang zah ta haksatna a tuak a le? Job 1:13-22 kikal ah, nikhat thu

in a hauhsakna tengteng mangthang/suksiati ahih thu i mu a, huai kia leng hilou in, a tate tengteng leng a si vek uh ahi. Mi ginom leh diktat, Pathian it mahmah Job in tua bang atuah leh, eite leng gingtu himah lehang haksatna tuak ding i hi chih a hon musak ahi. Job in haksatna atuah in bang chi'n amaituah-a chih en zual le.

“Ka nu' sul akipan in vuaktang in ka hong piang a, vuaktang mah in ka kiiKnawn diing. TOUPA'n ahon pia a, TOUPA'n ala nawnta. TOUPA' min phat in omhen! achi hi. Hichibang teng tuak mahleh, Job in Pathian mohpaih in, akhial het kei hi. (Job 1:21-22) ‘TOUPA'n ahon pia a, TOUPA'n ala nawnta’. Job dinmun ah nang ana kibulh lechin bang na chi dia? Bang lungput leh kampau i zang de aw? A zi bang a pau khak pen thil hithei lua ahi, Himahleh, Job bang in ‘TOUPA'n ahon pia a, TOUPA'n ala nawnta’ chithei chiat leng uthuai i sa mahmah ahi.

A thuchiam tangtunna ding himahleh bang ziak a haksatna hon tuak sak sese ahia? chih tuh dotna om thei lailai ahi. I

thuakte Toupa'n lemsa ahih banah, Pathian leh Setan kichouna ahi chih leng a muh theih ahi.

I THUAKNA PATHIAN LEH SETAN KICHOUNA AHI: Job tanchin ah i muh theih lunglut huai mahmah khat tuh, amah tungtang ah Pathian leh Setan a kichou uh chih ahi. Toupa'n Job ginom dan thei ahih manin Setan in a hihnat ding a phal a, a hinna bel lak a phal kei ahi. "Huchi'n TOUPA ma a Pathian tapate a hong kilak ni uh a om a, huan a lak uah Setan leng a hongpai sam a. Huchi'n Toupa'n Setan kiang ah, k'oh hong kipan na hia? a chi a. Huan Setan in TOUPA a dawng a, Lei a langkhat langkhat hoh a, a sung a, tou vak a suk vakvak ka hi, a chi a. Huan Toupa'n Setan kiang ah, Ka sikha Job na ngaihtuah ngei hia? amah bang a hoihkim leh mitang, Pathian kihta a hoihlou mudah lei ah lah kuamah a om ngal kei a, a chi a. Huchi'n Setan in TOUPA a dawng a, Bangmah lou dia Job in Pathian kihta ahi maw? Amah kiimvel in leh, a inn kiimvel in leh, a neih tengteng kiimvel in, ning chiteng ah umna na bawl kei maw? a khut nasep na vualzawl a, gamsung ah a neih leh lam a

pung hi. Himahleh tu'n na khut suaikhia inla, a neih tengteng khoih in, huchi'n na maitang ah nang a hon gense ding hi, a chi a. *Huan Toupa'n Setan kiang ah, Ngai in, a neih tengteng nang thu ahi; amah mah tung ah kia na khut kha ke'n, a chi a. Huchi'n Setan a kuan kheta a TOUPA ma a kipan in" (Job:1:12).*

Haksatna tamtak kawmkal a thahatna i neih theihna ding tuh "Toupa leh Setan ki chouna ahi" chih theihchetna ahi. Na ginomna ziak in setan a vuallel ding a, Toupa'n min thupina tang ding ahi. Huchi ahih kei leh na haksatna tungtawn in Setan kiuangsak tak in a om thei ahi chih thei in. Hichibang hun haksa ah Khrist neitute i hihna hong kilang ding ahi. Hinkhua ah lamzang leh nuamsa tak a i omlai in, Toupa phat leh pahtawi a, A min a i kalsuannate tuh ahi ding mah chih theih ahi, a vualzawl na dong a hinkhua nuamtak a zang i hih ziak in. Himahleh, haksat hun ah Khrist nei taktakte ading in Pathian thupina kilatna ding a hunlem ahi. I muanhuaina, i gin omnate midangte mitmuh a hong kilangkha tuh hon mu tute a dinga vualzawl na hong hi ding ahih manin. Job bang

in haksatna hun ah Toupa min thupina i pe thei diam? Hiai tan ah bei lou in, hinkhua a haksatna i tuahte 'Toupa i theihchet semna ding' a vanzat ahi chih leng Job hinkhua apan i muthei ahi.

TOUPA CHIAN SEM A I THEIHNA DING AHI: *"Hun paisa ah, mi'n hon hilhte kia ka thei a; himahleh tu in zaw ka mit ngei in nang ka hon muta hi."* (Job 42:5). Job in haksatna naktak thuak a, a neih leh lamte tan vek ahih banah, amah taksa ngei ah meima in apumtuam ahi. Huchibang hun ah Job tuh kipak a Toupa phat a laam ahi tuankei ahi. Aman leng theihshiam haksasa mahmah a, 'Toupa mai ah khial ngeilou hi'ng a, mi diktat hi'ng a' chihte achi thou ahi. Himahleh, a ginomna ziak in Toupa chiantak in a muh lawh ahi. A hinkhua nanung lam ah Toupa'n a neih alamte a leh nih in a hihpungsak a, tapa sagih leh tanu thum a nei a, khangli tan ah a tate, a tute leh tusawmte tan mu in kum 140 a dam ahi.

Nungkik zek lehang, Job in haksatna tuak a aom lai in, amah hehnem ding lawmhoih

thum anei a, mi pil mahmah ngen ahi uh ahi. Himahleh Toupa deihdan a thu agen louh ziak un Toupa atung uah a lungkim kei ahi chih i mu ahi. Mihing ah lametna ngak sang in Toupa mah bel tinten lehang, i mualsuah hun chiang in, Toupa athuchiam a amuanhuaina atak in i muta ding a, siatna ding hilou a hoihna ding hon ngaihtuahsak Pa ahihdan i theita ding ahi.

Khovel i damsung in haksatna i tuahte ziak avek in i theikei maithei, denchiang a van i tun chiang a avek a theichian ta ding i hihman in, tua hun ding lametna nei gingtute i hihman in Toupa ah kihihhat gige leng i chi ahi.

David leng galdou a akuan kal un, Ziglak ah Amelekte'n ava dou ua, Ziglak hal in, a neih alamte uh banah, a numeite uh leh a tate uh ana pimang vek ua, agaldoupiah sepaihte atung a lungkim lou a, suang a denlup a sawm ziak un, lungkham tak in a om a, huchih hunlai in Laisiangthou in 'David tuh TOUPA Pathian ah a kihihhat a' achi ahi (1 Samuel 30:1-6). Toupa min phat in om hen!

Nang leh kei a dinga thuaka sihna maituah dinga akisak lai in i Toupa Jesu Khrist in leng a thuak dingdan thei in alin mahmah a, himahleh, ‘Kei thu hilou in Nang thu hihen’ ana chi ahi. (Luka 22:42).

Haksatna i tuah dan akibang vek kei chih i thei a, mimal hatsatna, innkuan a haksatna, sum-le-pai a haksatna, nupa kal a haksatna, Toupa gam nasepna a haksatna, natna giltak a na a haksatna thuak bang leh adang dang tamtak i tuahte Toupa’n lemsa a hon tuaksak ahi chih

pomsiam i sawm dinga, nang tungtang ah, na haksatna zang in Pathian leh Setan kichou uh ahi chih theihshiam i sawm ding. Ginomtak a i-om a, Toupa ah i kihihhat zel leh Pathian thupina atak in i mit ngei in i mu ding ahi. Haksatna tungtawn a Pathian thupina pethei ding khop a khalam a ginomtak a omthei a, Pathian mah itpen a nei a, i thuaknate athawn a beisak mai lou a, Pathian thiltup tangtunna vanzat suaksak zaw dingin simtute Toupa’n hon vualzawl chiat hen. Amen! ■

TANCHINHOIH PUANZAKNA

(Mark 16:15-16)

- Upa T Paukhansiam, Missions Co-ordinator

Thupatna: Tanchinhoih kichi, Thu kipahhuai, Thu hoih, Hotdamna thu leh Tanchin kipahhuai chihte in a genchet theih ding hi. Mihingten Pathian dan i na bohshiat ziak un hotdam ngai in i na omta uhi. Huchiin Pathian in Atapa Jesu Khrist tungtawn in hotdamna hon bawlsak a, huai tuh tanchinhoih i chih ahi. Thukhunthak laibu ah Tanchinhoih kichi 119 vei vel genkhak in om kichi hi. Hiai Tanchinhoih in mihingte hinkhua pumpi, taksa, lungsim ngaihtuahna leh kha pumpi hondamna ding huamvek hi.

1. Tanchinhoih puanzak poimohna: Khovel ah mihing tuklehdingawn 6-7 vel phading a tuat ahi. Huaite lak ah tuklehdingawn 1-2 vel

Khristian hizou dinga gintak ahi. Huaidan ahihleh Khristian 33% khawng phazou dinga tuat ahi. Khovel ah pau tuamtuum sang 6/7 vel om a, huaite lak

ah 500 lelden amau pau in Bible nei uhi. Leitung pumpi a Khristian omzah 33% vel ahihlai in, India ah 3% khawng lel om hi. Khovel a Tanchinhoih lut tawmna mun akigen Chiang in India telkha zel hi. Hiai in mission nasepna poimoh mahmah ahi honchisak hi.

2. Tanchinhoih puanzak Saptuam mohpuak ahi:

Tanchinhoih puanzakna nasem ding a Toupa Jesun mohpuakna a piak saptuamte ahi. Muang mahmah in Vangam chabite hon kemsak a, hon theihna leh khak theihna thuneihna honpia hi (Matt.16:19). I chabi tawi bang i chizat a, kiveltuak i sa hi. Mizo Synodte Tanchinhoih puanzakna lam ah khovel theihphak in om uhi. A nasep uh etton tham leng ching hi. Tulel in missionary 1800 vel sawlkhia uhi. Aizawl khopi a Chanmari saptuam in kum 1994-2006 sung biakin bawl in tha-it mahmah ua, himahleh hiai hunsung mah in Tanchinhoih nasepna khawllou in paipih den uhi. Biakin bawl na in nuai 260 vel zangbei uh kichi hi. Hiai hunsung mah in missionary tamkhop sawlkhia in, mission fieldte ah biakin 28 lamzou in, kumteng in saptuam in mission field vehzou uhi. Tanchinhoih

meisel dekuang a tawisawn thei saptuam tuh saptuam hing ahi hi. J. Herbert Kane in, "I Pathian uh missionary Pathian ahi a, I Bible leng Missionary laibu ahi. Saptuamte leng missionary pawlte ihi ua, Saptuam in Tanchinhoih a ngaihsak kei leh ginna leng tawpsan ahi achi hi". Hiaibang ahihman in, Tanchinhoih puanzakna nna semlou Saptuam tuh mission field ahizel mai uh chi in ana kigen hi.

3. Tanchinhoih puanzak kichi thil manphapen piakkhia ahi:

DL Moody in, "Ka thil theihthe lak ah Tanchinhoih a manphapen a, huaiziakin ka thil theihthe lak a amanphapen genlou thei ka hikei" achi hi. Khovel ah thilmanpha tampi a om a, himahleh tangtawn daih ding khatmah leng omlou hi. Khovel kianga thilmanphapen pethei dinga hamphatna piakte i hih mahmah thupi in manpha hi. Vansawltakten leng a tankhak zohlouh uh hamphatna tangte i hihman in, thanuamtak leh kipaktak a sem ding in i kichial thakthak hi.

4. Tanchinhoih puanzak nam leh gam damna ahi:

Khovel a gam tuamtuamte dinmun

i sui chiang in, Tanchinhoih puanzakna nasep ngaipoimoh gamte Pathian in domsang zel hi in i mu hi. USA bang, siatna lam ah gending tampi om mahleh, tunitan in khovel a missionary sawlkhia tampen hilai hi. Hiaiziak mah ahidia, khovel a gamteng in Pa et in enthei mai uhi. England leh Welsh gamte, hundang a missionary sawlkhie zungzungte, tuni chiang in niamkiak hiaihi in, khovel thilte kia buaipih in neita uhi. England ngial tuh Pathian sang in football ngaisang zaw chihtheih ding in omta uhi. Biakin kai ding omzou nawnlou, biakinte kikhak chihbang kigen tam mahmah ta hi. South Korea

in Tanchinhoih nasepna pibawl mahmah in, missionsry tamtak sawlkhia in, mission buai in buai uhi. Pathian in a gam uh vualzawl in, khovel a gam khangtou hat mahmahte lak a chiamteh in omhial hi. Tanchinhoih buaipih nam leh gamte dingdet ding ua, a ngaihsaklou gamte pukse ding hi. Zawlnei Isai in, “Na nasem nuamlou nam leh gam lah a mangsin ngal a” ana chi hi. Huaiziakin, nam leh gam damna dinga poimoh tuh Tanchinhoih nasep mah ahi i chi hi. Hiai Tanchinhoih hinpilh a, hiai mah napi a neitheh chiat ding in simtute Toupa’n hon vualzawl chiat hen! ■

EBCC PENIEL PASTOR QUARTERS HONNA

EBCC Peniel, Kanaan Veng, New Lamka in February 19, 2024 a kipan Pastor Quarters lam/bawl a



pat uh zohsiang ahihtoh kiton in July 10, 2024 zingkal dak 7:00 in Pathian min thupina ding in Rev. Thawndoulian, Director of Ministries, EBC in honna leh Pathian khut ah latna nei hi.

Hiai hun ah Rev. M Zalian Guite, Divisional Superintendent, Lamka South Division in thugenna hun zang hi. EBCC Peniel ahihleh September 15, 2022 a EBCC Kanaan in a intuan hi a, tulel in inn 243, milip 1499 leh Upa Ordain 9 banah Pahtakna lai sang 3 om uhi. Local Pastor in Pastor MT Khanlal Guite om lel hi. ■

SAMSON IN A MISSION PATHIAN IN SEP DING ACHIH SEMKHA NASA HIA?

- Dongchinpau, Vengnuam, Omega Street

Tutung a tangthu igen ding tuh Bible a i muh chiat uh lehi theih chiat uh amin Samson ahi. A piandan/omdan/gamtatdante i theihdan uh leh amah hinkhua apan zil ding a i na kihilhsawnte uh Bible toh pangkhawm in enkhawm thak lehng ka chi hi.

A piandan ah: Numei chiipai theihna beinung a piang, a pian ding Pathian angel in nihvei mahmah va gen hi. Israelte hotkhiakna a hon pat a pat in a gamtatdan/a hinkhua zatdan pen paikhial leh khelhna a puk bang in commentary tuamtuamte na tawm in ana gen ua, ei saptuam leh saptuam dangte'n leng huai mah bang in ana gen uhi. Himahleh a hinkhua zatdan/gamtatdan diklou a i gen pen apan Pathian deihdan thugil a paipi pen ngaihtuah thak ni (Vai.14:4). Himahleh a nu leh apa'n leng hiai Toupa apan ahi chih a thei kei uhi. Philistiate'n Israelte tung ah vai a hawm ua, Toupa'n lah Philistiate tung a phulakna hun lemtang zong ana hi ahi.

Samson, Timna khua ah a nu leh a pate toh ava hoh masak a a sahang thah sung a khuaizu

avalak apan in a mission Pathian thiltup hih tangtunna ding lampi hong kipan hi. Huai tuh dotna "Ne tu nek ding pawt", "Hattak apan khumtak pawt," Philistia mite'n kitenna hunsung a theihkhiak ding, a theih kei ua leh puansilh 30 liauding uh. Philistiate'n a theih ua leh Samson in puansilh 30 liau ding, huchihlai in Philistiate'n a zi vau chihtak in a vau ziak un a thilhaksa ahon theikhia uhi. Samson in a piak ding bangmah neilou ahihman in Philistiate mi 30 thah a, a puansilh uh laksak in pia hi, himahleh Philistia mite akipak keihial ding uh chih theihsa leh amaute suk hehna masa a hong hi maimah hi.

Huai banah a zi inlam a a omkal in a lawmpa toh ana kitengsak ua, Samson heh in Sehal 300 val aman a, a mei uh meisel toh henden in Philistiate

loulai ah buhlak hun in a tai/khah a, a buh teng uh a kang a, Philistiate a kipak ding uam? Samson tung a a thangpaihna uh ziak in Samson sungpa leh a zi a that ua, huaileng Samson leh Philistiate a ding in hehna/hehhuai a hongsuak veve hi, Gaza a kizuaknu kiang ava hohsuk a ava giah ziak in kongpi a khak khum uhi. Huai kongpi pawkhia in Hebraon vum ah a koihi. A chipihthe'n kihaksial zen a Philistiate kiang a apiak ua leh Pathian kha in a pawl a, hatna pia in Philistiate 1000 valtak sabengtung khaguh in a satlum hi. Bangchituk in a heh ding ua ngaihtuah thak mah dih.

Philistia heutate'n a tactic/strategy a hon khek ua, Delilah zang in Samson mattheihna ding bangtan hiam hon geel nung un manthei uhi. Nungak a puk hilou in Pathian program gelsamah hon zui toutou ana hi maimah hi.

Hiai a tung a alaktom a gamtatna i taklatte pen Philistiate a milian vaihawm tengteng tan a a sukheh/thangpaih theihna ding a a gamtatna (factor) ahi chih thei ni. Eg. Sugar factory (Chini bawlna khawl) tundingna ding in a poimoh

1. Raw material – huai tuh Kawltu

2. A kaihkhawmna ding (Transportation facilities)
3. Power a khawl chituamtuam te paisakna ding
4. Labour (a na semtu ding)

Hiai a tung a factor i gente lemtang lou baihlamlou in kuamah in Sugar Factory (Chini bawlna) a koihi ngeikei uhi.

Dagon pathian ma a thillatni a mat a om Samson leng etnop bawlna a zang ding, silou chauh in kem uhi. Samson gamtatna Philistiate a sukthangpaihna tengteng ziak a Dagon pathian in a melma pa uh a khut ua pia/phuba laksak chi in kilawpna thupitak toh huai hall innpi a hong kikhawm uhi (Vai. 16:27). Hiai inn ah pasal leh numei a dim miuhmeuh uhi. Philistia milian tengteng huai ah omvek ua, Samson muhnop dia en mite pasal leh numei 3000 vel pha uhi.

Ahi a Samson in a damsung a seh a a omna (a mission) Philistia mi poimoh tengteng, vaihawmtute tel in phuba lakna ana hi maimah hi. Hiai hunsung in kum 20 a lut a, Heb. 11:32 ah Ginna a mi hangsan kigente lak ah ana tel hilou hia maw? Numei a puksia mai hilou in, Pathian in a zatnopna (mission) buchingtak a zang hizaw lou hia, na ngaihtuah thak mah dih aw. ■

BIBLE STUDY



Pastor Khamkhanchin Ngaihte, Local Pastor, EBCC Zion

Text : Ephesate 3:1-13

Thupi : PAUL NASEPNA LEH KHRIST A PATHIAN THUGUK

Thumasa: June kha in Zentelte leh Judate Jesu Khrist ziak a khat a hong suahna uh ina sinta uhi. Hiai kipumkhatna tuh Jesu Khrist a kinga kipumkhatna ahi a, huai in Zentel leh Juda gingtute ‘hihna thak’ (new identity) apia a, huaituh Pathian tate, saptuam ichih ahi. Hiai saptuam ichih ‘minam hihna’ (ethnic identity) a kinga hilou in, Jesu Khrist a kinga ahi.

Bung 3:1-13 ah leng hiai kipumkhatna mah hon zom tou in, Pathian’ Thuguk chiin Paul in gen hi. Hiai thuguk tangkoupiah, mite navaksak ding tuh Paul nasep ahi a, ama nasepna tungtawn a Pathian pahtawi ahihding Pathian deihdan ahi.

Bung 3:1-3. Thuguk kisel phoulakna: Bung 3:1. *“Hiai ziak in kei Paul, nou Zentelte ziak a Khrist Jesu hentapa in...”*

Hilhchetna. Bung 1:15-19 sung a ngetna thumna bung 3 ah hong zomtou hi. A ngetna tatak bel 3:14 ah kipan pan a, huai ma in Paul in Zentel namte kiang a tanchinhoih gending a Pathian in a sawl ahihdan hon gen masa hi.

“Hiai ziak in” (For this reason) thumal in bung 2:15-22 kikal a Paul in Khrist ziak a gingtute hihna/dinmun thak kigente pansan a Pathian kiang a

ngetna bawl ahihna hon taklang hi. “Nou Zentelte ziak a Khrist a hentapa” (prisoner of Christ for the sake of you Gentiles) chih in Zentelte a awlmawhna leh veina ziak a tanchinhoih a tangkoupiah ziak a suangkul tang ahi chih a gen hi. Philemon 1:9 ah leng “Jesu Khrist a hentapa” chih a zang a, Eph 4:1 ah leng a zang hi. Himahleh, hiai mun ah “nou Zentelte ziak a Khrist a hentapa” chih a hon behlap hi. Zentelte lak a missionary nasepna ziak a suangkul tang a, hen a om ahi chi ahi. “Khrist Jesu hentapa” chih in a gennop

tuh suangkul a khum a om ahih hang in, amah tung a thuneitu taktak suangkul a a khumtu Kaisar hilou in Jesu Khrist ahi chih ahi.

Tang 2. “...noute adia Pathian hehpihna nasepna piak a om ka hihdan na za tham ta ding uhi.”

Hilhchetna: Zentelte lak a a nasepna ama utthu mawng hilou a Pathian apan piak a om (divine source) ahihdan Paul in a gen chian hi. Hiai a “nasepna” kichi Greek ah *oikonomia* ahi a, English in ‘stewardship’ (kemtu/enkoltu) chihna in leng akizang hi. Michih a dia Pathian’ thiltup/plan a taklat kawm in huai Pathian thiltup sepsuahna dia mawhpuakna Paul kiang a piak ahihna a gen ot nop hiin kilang hi.

Tang 3. “*Huchi a akilakna tungtawn a Khrist thuguk ka kiang a thehsak a a om dante; tuma a tomchik ka gelh bang in.*”

Hilhchetna. Pathian in a piak hiai nasepna (stewardship) kipatna (source) leh a pianzia (nature) Paul in hon gen hi. Ama lemgelna hilou, muhkhohna le hi samlou, Jesu Khrist kilakna tungtawn

a Pathian in apiak ahi achi hi. Hiai a kilakna thumal kizang Galatia 1:12, 16 a Paul in Damascus lampi a Jesu Khrist kilakna a muh a genna kammal tawh kibang ahihman in, hihchiantu tamzawten hiai a kilakna kigen Damascus lampi a a thiltuah mah gen hiding in gingta uhi. Hiai a kilakna tuh “thuguk” or “thusim kiseel” (mystery) ahi chiin Paul in a gen. Hiai thuguk/kilakna in a gennop pen ahihleh Jesu Khrist a Zentelte leh Judate pumkhat asuah uh bang a Jesu Khrist Pathian tawh kilem a pumkhat suahna ding ahi. Hiai Pathian tangtawn thilgel ahi.

Bung 3:4-6. Thuguk Kisel hilhchetna: Tang 4. “*Huai na sim un Khrist thuguk ka theihdan na thei ding uhi.*”

Hilhchetna. “Huai na sim un...” chih in tang 3na a Paul in “tuma a tomchik ka gelh bang in” achi a kaw k hi. Tuma a tomchik (tomkim tak in) a gelh achi, hihchiantu Hoehner in, bung 2:11-22 sung a Zentelte leh Judate Jesu Khrist ginna tungtawn a sapumkhat or nam khat ahong suahna uh gen hiding in gingta hi. Huaimah

tuh Pathian' thuguk hun paisa a mihingte lak a iim a om tuhun a genkhiak a om ahi. Pathian tangtawn thilgel Ephesa gingtu te'n a theih ding uh kia hilou in a theih siam ding uh Paul in deih in lam-en hi.

Tang 5. *“Tu hun a sawltak siangthoute leh a zawlnei siangthoute kiang ah kha theih sak a a om bang in, tuma lam in mihing tate kiang ah theih sak in a om ngeikei hi.”*

Hilhchetna. Hiai a Pathian tangtawn thilgeel Jesu Khrist tungtawn a sepkiak a om ding tawh kisai Sawltakte leh Zawlneite kiang a theih sak ahihma in mihing kuamah lak/khang masate lak ah theih sak in a om kei chiin Paul in gen hi. Hilhchiantu F.F. Bruce in, “hiai kilakna thuguk tangthupha genna tungtawn in namteng kiang ah puanzak ahita; gingtute kiang ah puanzak ahi ta, aziak tuh amaute Pathian kilakna ngah masate ahih ziak un; Sawltak leh Zawlneite kiang a puanzak ahi, aziak tuh, amaute zang a midangte kiang a gensawn ahihman in,” chiin ana hilhchian hi. “Sawltak siangthoute leh Zawlnei siangthoute” chih in Pathian

adia sehtuam siangthou Sawltakte leh Zawlneite genna ahi a, huaite lak a khat tuh Paul ahi. Hiai kilakna Thukhun Lui hun lai sang mah in Thukhun Thak hun in chiangzaw leh bukim zaw a theih sak in a om hi.

Tang 6. *“Huai thuguk hiai ahi, tanchinhoih ziak in Khrist Jesu ah, Zentelte gouluahpihte, pumpi hiangte leh thuchiam tanpihte ahi uhi.”*

Hilhchetna. Hiai ah Paul in amalam a “thuguk” (mystery) achi ahon gen chiang hi. Huaituh, hehpihna ziak in ginna tungtawn in Zentelte, Juda gingtute tawh dinmun leh hihna kibang/kikim in Pathian inkuan ah pomlut ahita uh. Khrist ziak in Zentelte leh Judate pumpi khat kikop, goutan kikop in inkuan khat (saptuam) ahong hita uhi (cf. Rome 8:17; Gal 3:29; 4:7). Pumkhat suahna (union)chih a gennop pipen ahih tawh kiton in a hatsak thei ding paukam - gouluahpihte (fellow heirs), pumpi khat hihpihte (fellow members of the body) leh Khrist a thuchiam tanpihte (fellow partakers) chihte zang in Paul in pumkhat suahna

hon taklang hi. Hiai saptuam, Jesu Khrist sisan ziak a minam thak, lutang Khrist ahihziak in khovel kipawlkhawmna dangte tawh tehvual hilou ahi (Eph 4:15; 5:23; Col 1:18).

Bung 3:7-9. Thuguk kisel phuanzakna: Tang 7. *“A thilhihtheihna nasep dan bang a, Pathian hehpihna thawnpiak bangzel in huai tanchinhoih nasemtu ding a bawl ka hi.*

Hilhchetna. “Nasemtu” ichih Greek ah *diakonos* ahi a, a nasep pipen dawhkan ngak (table servants) ahi. Heutu thupiak bang bang a semtu ahi. A mawhpuaakna thupi pen leh masa pen tuh a sawltupa thu aman (obedience) ding ahi. Paul mah leng Pathian hehpihna ziak a huai tanchinhoih nasepna amah kiang a piak a om ahi (1 Kor 9:16). Tanchinhoih genna nasep ichih a tanchin neipa Pathian in hehpihna ziak a hamphatna ahon piak ahi chih thei a, kingaihniamna leh kipahna tawh sepding ahi.

Tang 8. *“Kei, misiangthou tengteng lak a a neupen sang a neuzaw kiang ah, hiai hehpihna piak ahi. Khrist hauhsakna*

suikhiak vuallouh Zentelte kiang a gen ding in,”

Hilhchetna. Paul in a gennop chi 2 om hi. Khatna, Pathian’ hehpihna hauhdan leh nihna, amah (Paul) chitlouhna thupi lua ahihna ahi. Pathian a thei tel a, huan amah leng aki thei tel. Huaenziak in, “misiangthou tengteng lak a a neupen sang a neuzaw” aki chi hial hi. Misiangthoute lak a a neupen sang a neuzaw chih leh Pathian hehpihna a hon genkhawm in gen thupitak nei hi. Paul in a hun paisa a phawk gige a, himahleh Jesu Khrist a ngaihdamna tang a, misiangthoute lak a sim tel ahihna a haih kei hi. Huaenziak in, “mikhialte lak a a neupen” chilou in, “misiangthoute lak a a neupen” aki chi (cf. 1 Kor 15:9-10). Zentel namte lak a Pathian thugending a sap ahihna tuh Pathian hehpihna ziak kia ahi achi.

Tang 9. *“huan Pathian thilbangkim siampa a tangtawn a sel a na om, thuguk kisel bang ahia chih mi tengteng musak ding in.”*

Hilhchetna. Paul sap ahihna in Zentel namte lak kia hilou a leitung a minam teng lak

a Pathian tanchinhoih puak ding a tunkhawm hi. Hiai thuguk mihing thuguk hilou in Pathian' thuguk ahi a, khovel namte kiang a genkhiak Paul nasep ahi. Zentelte leh Judate Jesu Khrist ziak a khatsuak ding chih Thukhun Lui hun in thuguk himahleh, Thukhun Thak hun in Jesu Khrist ah phoulak ahihna khovel mite theihdia hilhchetna ahikheileh huai thuguk a theihciamna ding ua mite lungsim ngaihtuahna vaksak, navaksak (enlighten) ding Paul nasep ahi. Pathian thuguk miteng muhtheihdia vak a koiikhia, luikhia (preaching)chihna ahi. Zentelte leh Judate pumpi khat a suahna uh bulpi tuh Jesu Khrist ginna ahi.

Bung 3:10-13. Thuguk Kisel in a tup: Tang 10. *“Pathian pilna chiteng van munte a kumpi vaihawmte leh thuneihnate kiang a saptuamte zang a, tu hun a theihsak ahihna ding in.”*

Hilhchetna. Thilsiamna (creation) leh tatkhiaakna (redemption) in a tup Pathian pilna tungnung taklat ahi. Hiai Pathian pilna chiteng taklatna ding a vanzat tuh saptuam ahi. Khamangthang matna leitung

a saptuam nasep ding poimawh mahmah ahih kawm in, saptuam dinsan leh tup pipen tuh saptuam neitu Pathian phat a pahtawi (thupina piak) ahi (cf. Kol. 1:16).

Hiai a “van munte a kumpi vaihawmte leh thuneihnate” kichi hilhchiantu tamzaw ten angelte genna hiin gen uhi. Saptuam lak a Pathian pilna thuguk kilang tungtawn in angelte tanpha in Pathian' pilna leh thupina mu a a pahtawi ding uh chih Pathian deih ahi.

Tang 11. *“Hiai atangtawn thiltup dungzui a Toupa Khrist Jesu a atup leh sepdan ahi.”*

Hilhchetna. Zentelte leh Judate Khrist a pumkhat suak a, amaute apan saptuam ahong kibawl ding tuh Pathian tangtawn thilgel ahi a, huaimah tuh Jesu Khrist tungtawn a sepsuah/sep buchin a om ahi. Hiai mah bang a, Jesu Khrist tungtawn a khovel Pathian tawh akilemkiik ding Pathian lemgel mah ahi.

Tang 12. *“Khrist Jesu I ginziak in amah mah ah maingalna leh kimuanna toh luttheihna I nei hi.”*

Hilhchetna. Zentelte leh Judate'n Khrist tungtawn a Pathian naih theihna a neih bang un, gingu kuapeuh in Khrist tungtawn in hangsantak a Pathian naihtheihna I nei chiat uhi (cf. Hebrute 4:15-16). Jesu Khrist tungtawn a Pathian naih theih kia hilou in, Jesu Khrist kia Pathian naihna dia lampi dik omsun ahi (cf. Johan 14:6). Sahkhua dangte tawh Khristian sahkhua a kibatlouhna lian mahmah hiai ahi.

Tang 13. *“Huchi in noute ziak a ka gimthuak ziak in lungke lou ding in ka hon ngen hi, huaite na thupina uh ahi.”*

Hilhchetna. Zentelte lak a tangthupha gen ziak a mat a om Paul in, a nasepna ziak a thuakna leh bawlsiatna a thuakte ziak a lungkham a lungke mailou ding in Ephesa gingtute hanthawn hi. Khrist min a a thuakna gahsuaah ding tuh gingtute thupina hiding ahi chiin khamuan in chou hi. A gimthuakna in Khrist Ni naisak a, huai lah amaute adia pahtawi a a omna ding uh (glorification) ahi chi hi. Jesu Khrist hong pai nawn hun in gingu

teng in pahtawina tang ding ihi (cf. Rome 8:17, 18; 2 Kor 4:17). Himahleh, huai hun a tun ma in ginna ziak a thuakna (suffering) om ding ahi. Huaiziak in, manglukhu ngahna ding lampi tuh linglukhu ahi akichi hi.

Zawhna: Pathian pilna bukim kilatna thupipen tuh khelhna ziak a mawhpaih a om mihingte leh a khiallou, a siangthou Pathian Jesu Khrist tungtawn a kilemkikna ahi. Hiai mah tuh Pathian tangtawn thilgel ahi. Jesu Khrist tungtawn a Zentelte leh Judate pumkhat suak a, Pathian inkuante ahibbang un, ginna ziak in gingu tengteng pumpi khat a gawmkhawm i hi uhi. Jesu Khrist, i Siampi lian tungtawn in Pathian tawh i kilem uhi. Amah kia Pathian naihna lampi dik om sun ahi. Hiai mah tuh gingu teng a dia thu kipahhuai ahi. I Siampi lian Jesu Khrist, eite thuak sang a haksatna mulkimhuai zaw ana thuak, amah i zuih ahiman in hiai leitung a haksatna i thuakte'n amah ahon naihsak sem a, a mela hon muhsak ding Pathian deih ahi (Rome 8:28-30). ■



Gammial Aw

Khamangthang dingte itna ziak a thumna leh thilpiak a na pang gige saptuam mite I Toupa leh hondampa Jesu Khrist min in chibai aw! Toupa gamna sepna dinkhawl theilou ahih dan phawk a thumtute leh thilpiak a tawlngalou a na pang gige ziak a tuni dong field a i kalsuannate maban sawnthei zel i hi chih muh theih a omte ziak in kipahhuai i sa mahmah hi. Pathian vualzawl na ziak a field a semtute tungtawn a i kalsuannate thawnlou ahih dan khateng report a muh theih a hong omte thupi i sa a, tu in leng Pathian vualzawl na i tan leh kalsuanna omte enkhawm nawn ni.

A. HIMALAYAN MISSIONS FIELD

KIPAHTHU GENNA LEH THUMNA DINGTE:

1. Toupa'n semtu Missionary-te sepna tungtawn in gingthak 8 (Birgunj-1, Damak-1, Itahari-1, Kathmandu-1, Khudunabari-1, Taplejung-1, Chyangthapu-1, Bihidin-1) leh Tunibote saptuam apan baptisna tangthak khat hon piak nawnte ziak in kipahthu gen ni. Gingthak leh Baptisna tangthakte khalam kalsuanna ding Khasiangthou pina leh makaihna ngetpih ni. Amaute ginna a hong dinkip semsem ua, khovel thil a kaihbuai a hihlouna ding un thumpih ni.
2. Semtute'n ginglou mi tampi houlimpih a neihte lak ua Pathian thu lunglut tamkhop tak om ahihman un, amaute Khasiangthou in a lungsim ua na hon sep a a kikhek theihna ding un thum ni.
3. Semtute a sepna mun chiat ua khovel thilte'n a hihbuai louh ua, lungsim kaihek thei leh sa-le-kha a damna hihse theite lak apan kep leh venbit ahihtheihna ding un thumpih ni.
4. Biakin kilamlel-te Pathian min thupina ding a zohpah ahih a, biakinte zoh ahih hun a khamangthang tampite hotdamna huang a pilutna mun ahihtheihna ding in thum ni.

B. DHEMAJI MISSIONS FIELD

KIPATHU GENNA LEH THUMNA DINGTE:

1. Semtu Evan T. Chinbiakmung leh a lawinu Lunkim kal ah Toupa'n gil a gah goutan tapa June 24, 2024 in pia hi. Kipathu gen in, naungek leh anu a chidamna ding un thumpih ni.
2. Semtute damlouna chi tuamtuanme'n bawm zel mahleh buaise zen omlou a Toupa'n damna hoihtak a piakzel ziak in kipathu gen ni.
3. EBCC Garhpara saptuan apan Toupa'n gingthak Ponsami Basumatari leh Lakhimai Chungkrang hon piakte ziak in kipathu gen ni. Amaute khalam leh salam a hong khan hoih theihna ding un thumpih ni.
4. Semtute'n EBCC Kapurdhuwa a ginglou nupa Kiruth Ngatey leh a zi counselling neihpih uhi. Amaute'n salam damna kia hilou a khalam a suahtakna tanpha a neihna ding un thumpih ni. Semtute'n a houlimpihsa uh Jornat Kutum leh Innkuante, Rebot Doley leh Inkuante ban ah Soshi Pegu leh Innkuante'n houlimpih a hihna tungtawn ua Jesu Khrist Lal leh hondampa ding a a saantheihna ding un thumpih lai ni.
5. Pityang Chapori a khosa Paksere Regon leh a innkuante'n Pathian thu a lunggulh bang ua a lungsimte uh Pathian in hon hong sak a, khasiangthou in naa a sep theihna ding in thum ni.
6. Morahuti a khosa Mr Suren Taid, lungsim lam buaina nei a, a hong damsiangpahna ding leh EBCC Garhpara a i gingtu Chenimai Doley leng damlouna nei a om a damna hoihtak a neihna ding in thumpih ni. Field a gingute leh gingloumi te'n damlouna a tuah chiang un semtute thumna ngaina mahmah ahihman un, thumsakna neih a hih hun ua damna a ngahtheihna ding un semtute'n khasiangthou thopna a hunhun a atan theihna ding un thumpih zel ni.
7. Pityang Chapori a khosa nungak Siya Regon gingtu hinaikei mahleh gingtute biakhawmna hunte ah va kihelthei zel hi. Hotdamna thu a zakte leh thumtute thumnate ziak in Khristian hihding lunglutna neithe i de k panpanta ahihman in thumna toh delhzui ni.

C. HOJAI MISSIONS FIELD

KIPAHTHU GENNA LEH THUMNA DINGTE:

1. Semtute'n tuition tungtawn a a sepna uh lamzangtak in sem tou theizel ua, tu in naupang 26 piak in ki om a, amaute'n kumkim exam zoutheita uhi. Tuition tungtawn a naupangte lak a nasepna hong gahsuah a, gah kipahhuaitak muh ahihna ding in thum ni.
2. Hojai area a semtute'n a Meitei khua mun tuamtuan pha a kalsuan theizel ahihman un kipahthu gen ni. Kalsuannate thawnlou a Pathian vualzawlina thupitak tunung a muh ahihna ding in a kalsuankhia semtute leh houlimpih a om agam mite thumpih ni.
3. Mr. Mani Singh kichi gingtu hilou himahleh Pathian thu lunglut mahmah hi. Pathian thu a lunglut ziak mah in Pathianni Chiang a semtute biakkhawmna hun ah kihel thei zel hi. Mr Mani Sing in Pathian diktak hon muh a, Jesu Khrist Lal leh hondampa ding a hon san theihna ding in thumpih ni.
4. Lanka Station a semtute'n chidamna in semzom thei zel uh kipahthu gen ni. Amaute'n maban ah panlak dingdan gel a kalsuanna neilel ahihman un, Pathian ompihna toh gahsuah leh chidamtak a hon sepzom theihna ding un thumpih ni.

D. GOALPARA MISSIONS FIELD

KIPAHTHU GENNA LEH THUMNA DINGTE:

1. Field a semtute'n a lawmbawl theih ding uleh houlimpih theih ding mi a hunhun a Toupa'n hon piaksak zelte ziak in kipahthu gen ni. Houlimpih a omte'n a thuzak uh tungtawn ua Pathian hing hon muh ua, khristian hong suahna ding un thum ni.
2. Field a Free Medical Camp neih a om lamzang tak a zoh hita a, First Aid Project Ministry leng semtute'n panthei ding dinmun a omta ahihman un kipahthu gen ni. Ministry manpha, gahsuah leh lohching a hihna ding in thumna in delhzui ni.

E. KAMRUP DISTRICT:

KIPATHU GENNA leh THUMNA DINGTE

I. LOHARGHAT STATION

1. Loharghat mun pansan a semtu Evan M Daizachin leh innkuante'n chidam in a sepna maban uh semzom thei zel uhi. Houlimpihsa a neihte vaveh thei zel a, houlimpih theih ding mithak leng Toupa'n hon piaksak zel ziak in kipathu gen ni.
2. Mr. Hukuleshwar Boro taksa damlou ziaka lupna ngak a om kiang ah semtute'n Pathian thu genpih a thumna neihsak thei ahihman un manpha i sa hi. Thumsak ahihna tungtawn a Pathian hing hon muhna ding leh tangthupha genpih theih aom mite'n leng Pathian lam a ngat theihna ding un thumsak ni.
3. Gintu thak Mrs. Rosmi Rabha & innkuante'n khosung mite apat vauna amuh ziak un lauhthawn gunkna nei ua, amaute toh fellowship semtute'n ki neizom theilou uhi. Toupa'n a hoihlam a amaute leh a khosung mite kal a lampi hon bawlsakna ding in nakpi tak in thum ni.

II. CHHAYGAON STATION

Chhaygoan Station pansan a semtu Evan Kaplun Paite leh a lawinu'n Pathian ompihna toh chidamtak a sem in, kalsuan zom thei zel uhi. Kipathu gen in, Pathian in kalsuan theizel dia a nupa ua damna a piak a, a sepna tungtawn ua gah kipahhuaitak muh ahihna ding in thum ni.

III. BAMUNIGOAN STATION

Evan Thangbiaksuan leh innkuante'n Pathian ompihna toh chidam in maban sawn thei zel uh kipathu gen ni. Pathian khasiangthou thopna leh a deihna bang a kal a suanzel theihna ding un thumpih ni.

IV. DHUPDHARA STATION

1. Evan K Kamkhenthang in Dhupdhara Football Academy te lak a coaching pia a va kihel theih ban ah hiai hun a naupang 30 vel toh kimawlina tungtawn a kimeltheihna nei

- a hun zangkhawm thei ahihman un manpha i sa hi. Football Academy tungtawn a mite toh kimeltheih tuahna, kichimatna leh kizopna hoihtak hong omna ding in thum ni.
2. Dhupdhara Football Academy a naupang coaching piak a omte nu-le-pate toh kichimatna hoihtak hong omna ding in thumna ah phawk ni. Toupa'n hiai football coaching hon vualzawlsak a, tangthupha tangkoupihna ding a vanzat poimoh a hihna ding in thum ni.
 3. Pathian in Rabha mite lak a tanchinhoih gentheihna ding kong a hon hongsakna ding leh semtu innkuante Pathian vanzat manpha ahihna ding un thumna in phawk ni. ■



DORCAS *Corner*



Pathian chitnate leh a lainatna thupite ziak a chidam-ludam a om i hihman in a min i phat masa hi. August kha hon musak Hondampa Jesu Khrist min in chibai k'on buk hi.

Huan unaute aw, na vek un thu kibang na gen ua, na lak ua kikhen na himhim a omlouhna ding in lungsim munkhat leh ngaihtuah munkhat a diktak a na kizop chinten zawkna ding un Toupa Jesu Khrist min in k'on ngen hi (I Kor.1:10).

Paul in Korinth Saptuamte kiang ah lungsim munkhat leh ngaihtuah munkhat a kipumkhat a om ding hahgen mahmah hi. Khat leh khat gingtute lak ah kilainattuah a khosakkhawm ding, kithutuak a om ding leh kitheihshiamna a poimoh dan uangtak in gen hi. Kipumkhatna i gen chiang in lohchinna, lamzanna toh kizui den hi. Mi kuapeuh lungsim munkhat, ngaihtuah kibang a hong omkhawm ua, na hon sepkhawm chiang un lohchinna maban ah limchitak in ngakzel hi. Pawlpi khat khotang ah hiin, saptuam ah hitaleh, kithutuak a tup kibang a hong pankhawm chiang un, a hatna uh hong kigawm a thil thupitaktak semkhia uhi. Pawlpi khat in tup kibang nei a, khotang a khat leh khat

panpihna kipetuah ding ahihkei leh saptuam pawlpi a gingtute pangkhawm leh kipumkhatna ah tha kipetuah in maban ah lam chituamtuam a sep leh bawl bangkim ah khantouhna om hi. Lohchinna hiam, khantouhna i chih mimal hihtheihna leh siamna ziak kia ahikei a, mipi pangkhawm a i hihtheihna omte genkhawm a i sepkhawm ziak leng ahi hi. Kipumkhatna poimoh namai zen e! hon chisak hi.

Kipumkhat a om a poimoh diakna leh a gah:

1. “Ngai in unaute kituak diamdiam a omkhawm a nakhoih in a nuam mahmah hi” (Psalm 133:1): Hiai Laisiangthou thu in gingtute a ding a kipumkhat a om a hoihna leh kilawmna hon gen hi. Unau, inveng, khotang leh saptuam ban ah pawlpi khat peuhpeuh kithutuak tak a a hong khosak chiang in thil hoih hong piang a, kim leh kiang ah khantouhna om hi.
2. “Lemna Kha a kipumkhatna vom chinten ding in” (Ephesians 4:3): Kipumkhat a om i chih in thadahna panglou ding, thanuam leh taihmakna toh mimal chih in panlak ngai ahi. Adiak in gingtute thanuamtak a kipumkhatna kemit ding in Kha Siangthou tungtawn in i lungtang ah kihongtak a semsak ding in hon hanthawn hi.
3. “Sik in sik a hiamsak bang in mihing in a lawm mel a hiamsak hi” (Proverbs 27:17): Kipumkhatna a omna ah kuapeuhmah kipanpihtuah leh kiasottuahna om a, kideidanna omlou in nuam kisa hi. Gingtute huchibang a om chiang in khat leh khat tha kipetuah in a hatloute hatsak in om ua, a neiloute leng midangte’ panpihna toh zangkhaitak in khosathei uhi.

I niteng hinkhua a kipumkhatna i latkhiaksak theih dingdan:

Kipumkhatna hinkhua zang ding i chih leh ei lampang a pan i lak masak kul hi. Mi toh kilem chih lel hilou in, hihna tuam, khat leh khat kingaisangtuah ding, tup kibang a om ding ahi. Tua ding in:

1. *Lemna zong in:* Mi kuahiam toh kilemlouhna na nei a, lungsim nuamlou a na omleh kilem kik teitei ding dan zong in. Amah ngaidam in la’n na kal uh bawllem in. Amau thugente hoihtak ngaikhia in, amau etdan theihsiampih lechin nemtak leh awl in a hong dam mai ding hi.

2. *Khotang ah kizang in*: Khotang nasepna ah kihel in, nang ut leh lungput in hiam ahieh kei leh a pawl in, kikhopkhawmna poimohte ah kihel in. Kim leh kiang a panpih ngaite panpihna khut zak inla, lohchinna ngahte kipahpih dan siam in haksatna a tuah hun ua panpih ding na hihdan hihl in.
3. *Saptuam leh ginna ah*: Hiai point i genuang deuh ding – Kham thil a kikhopkhawmnate ah kihel in gingu dangte toh kham thu houlimna leh thumkhawmnate ngaihpoimoh gige ding ahi. Thumna in thil thupitak hihthei ahi chih mangngilh kei ni. Khristian gingtute ginna bulpi tuh thumna thilhihtheihna a om ahi i chinuam hi. I thumnate Pathian in hon ngaikhia in a hon dawnnate i muzel hi. Huaiziakin, amah pina leh makaihna ngen a thum ngitngat ding in hon hasuan hi. “Ngen un, piak in na om ding uhi, zong un, na mu ding uh; kiu un, a hon honsak ding uhi” chi hi (Mat.7:7). Kumpipa Herod in Jakob, Johan unau, namsau in a satlum a, Judate a kipak mahmah uh chih a theih in Peter leng a man a, thah tum in suangkulh ah a khum hi. Huchiin sepaih pawl li, li chiat zel in a venkhelsak hi. Mihing lam ah chu a vengte a khauh di ua, taikhiak theihna vual ahikei hi. Himahleh saptuamte’n Peter a ding in phatuam ngaitak in Pathian kiang ah a thumsak uhi. Pathian in saptuam gingtute thumna ngaikhia in a dawng a, a van angel sawl in suangkulh a kipan in lamdangtak in a pikhia a, a suaktasak hi. Saptuam thumpawlte kiang ah Peter a vapai a, Pathian in suangkulh a kipan a pikhiakdan a hilhta hi (Nas.12:1-17). Lungsim tengteng toh Pathian kiang a lamentak a i thumnate Ama’n kul leh poimoh a sak bangzel in dawnna hon pia hi. Thumna thilhihtheih dan na hinkhua ah na tangkha ngeita hia?

A tawppen in, unaute aw, kipaktak in om un, na omdan uh bawlhohi unla; k’on ngetna limsak unla, khamuangtak in om unla; lungsim munkhat pu unla, kituaktak in om unla; huchiin itna leh lemna Pathian na kiang ua om ding ahi (2Kor. 13:11). Lungsim kipumkhat in gingu saptuamte leh mimal chihte thumna thilhihtheihna tungtawn a lohchinna ngah ding in Toupa’n hon vualzawl hen. ■



YOUTH *Corner*

TULAI KHOVEL LEH KHRISTIAN TUAILAI

Pathian hehpihna leh a zahngaihna ziaak in khovel setak lak a tuni tan hon pitu i Toupa leh Hondampa Jesu Khrist min in koimun peuh a om ka tuailai pihte Khrist itna toh chibai ka hon buk masa hi.

Khristian khangthu a gingtu vualzoute'n amau *"tulai khovel"* ana zou chiat uhi. Vualzou Khristianten amau hun ah bangchi teng khemna ana tuak himahleh ana zou jel uhi. A lehlam ah, Pathian kipahna tungsak zou lou gingtuten tuh amau hun *"tulai khovel"* pen ana zou ngeilou uhi. Hiai leitung hinkhua ah bang hunteng in le a vualzoute tuh a vuallelte sang in kipak zaw ua, Pathian kipahna leng ana hi uhi.



Tulai khovel i chih in bangteng huam ahia? Eimah hun a i hinkhua sunawngkai thei, hon hatlou sak thei, leh hon suse thei tengteng uap mai ahi. Khovel thil a nopchetna, duhamna, thumanlouhna, dan lou bang a gamtatna kichite khovel om tung apan omsa ahi. Noah hun lai in khovel pen khatvei gawtmang ding hial in ana gilou ahi. Pathian thangpaihna ana sukha mahmah ua Pathian thangpai in tuichim in a na gawt a Noah leh a inkuante chihlouh leitung a mihing a dam omlou hi. Pathian in tuichim tung nawn lou ding a kichiamna in sakhituihup ana bawllou hileh khovel bangzahvei hiam tuichim a gawt a omta ding hi.

Dema in ama *"tulai khovel"* ana ngaihnat ziaak in Pathian nasepna ana nusia mai hi. Paul toh semkhawm ding khop a hamphatna tang mahleh huai nna pen nutsiat mai ding pammaih mahmah ahihlam manghilh kha hi. Aman tuh tua nasepna pen a na nusia tuh ahi mai a, ngaihtuah theih khat tuh Pathian nasepna nutsiat a khovel lam a akik kithaman na hiam? chih Dema kidong leh, "e khai kithaman lou hial chi ding a, ka theihlouhman ahi, kei tuh a khial ka hita in hong kik thei leng ka hi kei" chi ding a gintak huai

ahi. Toupa nna kipak kawm a sep kan a hamphatna dang omlou ahi. Laisiangthou ah a nna semnuamlou nam leh gam mangthang ding chilai ahi.

“Tulai Khovel” i chih in bangteng uap ahia?

1. Sum in a leitheih phot lei a neih in lungkimna om ding a ngaihtuahna (materialism) ahi:
 Neih theih teng neih in kipahna hon tun ding a gintakna a nei ua himahleh tua ah kipahna omlou ahihdan hon theih chiang un zekai mahmah jel hi. Khovel a bangmah lutpilhrou in bangmah pawtpih lou ding, Khovel leh a thupina toh mangthang khawm ding hi.
2. Zawn-tatna leh utdandan a omna ah lungkimna om ding a gintakna (hedonism) pen Noah hun lai apat ana om hita, Sodom khopi thanghuaisak leng hiai mah ahi. A khang a khang a Pathian thangpaihna tuntu tuh zawntatna leh thanghuaitak a mahni utdan a omna hinkhua ahi.
3. Nek leh dawn ah kisuklimna ngaihsangna (Bible in zumun nopna a chihte): Nek vah luatna, duhgawlina kichite mihing hinkhua melsesak hiden ahi. Zumun samun a kibualna pen eimah mimal hinkhua, nupa kal, insung leh adangdangte hon susetu ahi.
4. Nekgukna leng a sia a ngaituah lou in chettheihna leh ahi ding mawng a ngaihtuahna (kuama'n hon muh/theih kei nak a ka hihtheih ahihnak leh chihna) ahi. Dangka sum deihtakna zaw gilou chiteng bul ahi chih a theilou leng ki omlou hi. Himahleh sum deihna in guktatna, lepchiahna leh duhamna hon tun ahi.
5. Sepna mun ah ginomlouna leh chihtak louhna (cf. lei chi, khovel vak hon chihte kigamla mahmah sek hi). Semlou a loh lak, sepna mun a omlouna, guk theih leh lak theih teng lakna leh adang tampi omlai...Mahni kidiksakna, kisiamtanna toh kidim i himai thei, himahleh ngaihtuah thak ding a hoih mahmah ahi. Nang omlouh ziaak, nang seplouh a midang na sepsak a poi bangzah om a? School ah, Hospital ah, Office ah.
6. Mit ah muhnopna leh taksa utna (lustful eyes) pen Eden ah Evi in ana tuahsa ahi. Tuni tan in leng setan a khawkwaw leh

kilawm zaw a tam zotham in hon zol den lailai hi. Tulai diak in mihingte a tek a khang mi khempeuh hon subuai a mit a muhnop thilte a hip leh pimang in ki om hi. Internet porn ah buai thei gingtu hinkhua pen hehpihuai mahmah ahi, hiai ah ei minam sung mahmah ah leng mitamtak awkta ua, hehpihuai mahmah uhi. I mobile leh internet in hon bawlse gawp in inkuan tamtak kisiatna, nupa tamtak kisiatna leh tuailai tamtakte pukna suak maimah hi.

7. Pathian leh A Thu ginlahna leh sakhua dang taksanna (pluralism) a honglut a, naupang leh tuailai tamtakte hinkhua a bible gintaklouna leh khovel pilna pen gingta zaw kitam mahmah hi. Bible ginlahna hong pung a, Eden huan a Pathian in Evi kiang a chiangtak leh bukintak a ahilh sang a Gul gen pen gintak zawkna toh tulai hinkhua kibang hi.

Hichi bang hinkhua toh bangchin khovel i zou thei mahmah dia? Laisiangthou a zohna lampi kichiantak a hon kawkh, Laisiangthou ah kikhawn ni. David in “Na tung a thil ka hikhelhel louna ding in Na thu tuh ka lungtang ah ka kholkhawm” ana chih pen zohna lampi kichian tak ahi. A polam kilawmna leh a huauhuaute tawpsan in, diktak mah in tulai i palkhak hinkhua pen zou ding in Toupa'n simtute hon vualzawl chiat hen. ■



CHILDREN'S *Corner*

MEMORY VERSE MONTHS

Naupang Sunday School ni poimohte i et leh August leh September kha tuh “Memory Verse Months” kichi hi. Huai omdan tuh, naupangte’ Laisiangthou etlough a theih a poimoh dan sinsak ding leh, sinlai tangvom a sinsate etlough a gen kitaitehna neihpih ding chih ahi. Pichingte’n tuh saupi gen lough in leng i thiltup thei pah ding in i kigingta hi. Huchikawm in, i ta-i-naute’n Laisiangthou thu, etlough a gentheih a neita uhia? Tua sinsakna lam i ngai

poimoh uhia? chihte eimah kidong in, huailam ah thathak la ding in i kihanthawn hi. Naupangte' etlouh a Bible tang i theihsak Chiang in thutak a lungtang ua tuh i hi a, a manpha mahmah hi. Naupangte Bible tang enlou a zilpihna ding ziaak leh hih dingdan tamlou i genzek ding.

BIBLE TANG ETLOUH A GENTHEIH A POIMOHNA

- Pathian in hon thupiak ahihziak in (Deut. 6:6; 11:18).
- Naupang theihna a behlap sak a, huai in amah a panpih dia; ahihna ah kipahna leh lungmuanna ape ding hi.
- A manphatna a thupi luat ziaak in (Sam 119:9-11; Rom. 10:17; 2 Pet. 3:18).
- Pathian thu naupang lungtang ah selguk a om tuh a mawkna in a mangthang kei ding hi. Huai a lungsim a theihstate a hinna a hong khantouh dong in Khasiangthou in vualzawlna pe ding hi.
- Bible tang enlou a a theihte un naupangte khemna lak ah panpih thei a, huan thupukna amau kia a lak a ngaihna mun ah a Bible tang sinte un panpihna pethei hi.

BIBLE TANG ENLOU A SINSAK DINGDAN

- A sinsaktu in kithalawpna a neih apoimoh masa a, amah leng enlou a sin ding a akisakkholh ding ahi.
- Naupangte Bible diktak a zilsak ding ahi, amaute lungsim hat mahmah uhi.
- A chimtaklouh dingdan uh ngaihtuah a akithalawp theih dingdan uh gelpih ding ahi.
- Thumal haksate a theihshiam ding un hihchian inla, abung atangte leng zilsak mangngilh louh ding ahi.
- Na tang sin pen uh a thu a theih mai hiloua a taktak a zangthei ding in hih in. A thuzilte uh amau ading bangtaka a theih Chiang un na sinsakna lohching na hi ding hi.

Hiai a tunga kigente, nu-le-pate banah Naupang sunde skul a sinsaktute'n i theih teitei ding ua poimoh ahi. Naupangte' eimah khutsung a i kep theih hunsung un Pathian thutak a tamthei pen i theisak ding uhi. Khovel pilna leh siamnate lunggulh luat man a khalam thilte sinsak ding na mangngilh kha ihih in zaw kisikhuai ding ahi. ■



EBC Innsung Thu

MUSIC MINISTRY REPORT:

Mr. Thangbiaklal Valte, Music Promoter EBC kizatna khenkhatte: Apaita July 1-6 leh 22-26, 2024 hun sung TBYF EBCC Immanuel ah Sol-Fa Training leh lasak dingdan kisinsakna hun zat in om hi. July 8 - 21, 2024 hun sung EBCC Tanguam malakna in khangthak naupangte khualna in Music & Solfa Training programme kalnih sung vingveng neih in om, TBYF EBCC Bethlehem ah July 18, 2024, in “Biakna leh Phatna” makaihna toh kisai in thugenna/kisinsakna hun zat in om hi. Hiai hunte ah Music Promoter EBC sinsaktu in pang hi. Hiai bang hun zatnate lemgel bang a zoh ahihtheihman in Toupa thupina pia in A kiang ah kipahthu i gen ahi.

EBC MUSIC LEADERS’ CAMP 2024:

EBCHQTRS. in a khatveina ding in a hong tung ding August 27-29, 2024 (Sepnawnni - Ningani) tan daih ding “**EBC Music Leaders’ Camp 2024**” neihna ding ah tu-le-tu in Lamka North Division leh Lamka South Division sung a tuailai local saptuam a kizang mahmahte leh hun hongtung zel ding ah kizang dingte kitat hiamna masa sai ding kisawm hi. Hiai hun ah Keyboard, Guitar, Worship Leading and Choral Conducting leh adangdang sinsakna hun om ding hi. Khua khat apan music lunglut tuailai numei/pasal mi 3 LND/LSD kihel ding a lamet ahi. Registration form DS tawn in hong kihawmkhia a min leh workshop/class telna ding fill-up a Music Promoter kiang ah August 20 tan a pelut ding in i kingen in i kitheisak hi.

EBCC CHENNAI SOLFA SINNA NEI:

TBUC Year Plan a kiguang bang in leh EBCC Chennai Saptuam mipi a dia poimoh Solfa sinna neih ding ka sawm uh, June 24-26, 2024 sung in ka nei thei uhi. Hon sinsaktu ding in Headquarters apan in Heutupa Siamkhansang Choir Conductor, EBC Central Choir

kizang hi. Hiai kisinsakna ah EBCC Chennai apan in mi hunkhop tak kihel in nuam leh lohchingtak in kisinsakna ka zouthei uhi. Hiai bang hamphatna hon bawlsak heutute leh i biak Pathian tung a kipahthugenna hiai Khristian Thukizakna tungtawn in ka hon taklang uhi. Thupina tengteng Pathian in tang hen.

- *T/Upa Chinlianmang Tonsing, Secretary TBUC, EBCC Chennai*

BYF FLAG TOH KISAI:

BYF in Flag toh kisai program tuamtuan a deihna leh zat utna omkha sek ahihman in a omzia theihchetna di'n hiai a nuai a kipia pointte chiamteh ding in i kingen hi.

1. **Flag min:** Baptist Youth Fellowship Flag
2. **Colour (Rong) kilep dan:** Angou (White), Adum (Blue), Ahing (Green)
3. **Colour (Rong) 3te etsakna:**

Angou (White) = Siangthouna (Purity)

Adum (Blue) = Chihtakna (Inspiration, Sincerity, Spirituality-te lakhawm in)

Ahing (Green) = Khang ding (to grow, Self-respect)

A laaktom in: Sianthouna, Chihtakna toh nna-hoih sem a khang ding chihna ahi.

BYF Flag Colour Code (CMYK):

WHITE: #FFFFFF **BLUE:** #25275F **GREEN:** #00652E
C:0 M:0 Y:0 K:0 C:100 M:97 Y:32 K:24 C:100 M:0 Y:100 K:50

4. **Flag size:** Ratio 2:3; Size: 3ft x 4.5ft ahi ding.
5. **BYF Logo:** Flag a logo koih utte a ding in a laitak a koih ding, logo omlou/tellou leng BYF Flag hiveve ahi.
6. **Saptuam min:** Saptuam min gelh nuamte adin logo nuai a Hing (green colour) mun a gelh ding ahi. Logo a kikoih leh Baptist Youth Fellowship chih vagelh tuan a ngaikei.

Chiamteh ding: BYF Flag pen kilawmsakna a neih maimai ding hilou, decoration ding khawng a kinei leng hilou, tup leh ngim hoihtak leh message nei ahildan chiamteh a zat ding ahi.

Hiai flag toh kisai thuchian kim zaw Youth Co-ordinator kiang ah kantheih ding hi.

TUAILAI HOTDAMNA CAMP LOHCHINGTAK IN KIZOU:

EBCC D Leikot in ‘**Tuailai Hotdamna Camp**’ June 19-23, 2024 sung kinei hi, hiai camp thupi ding in “**Na Pathian Tuakdin Kiman In, Amos 4:12**” chih leh thugentu ding in Pastor Nehlal ILM (International Love Ministry) leh Evan Paumonsem Singson ahi uhi. Hiai Camp ah mi 53 kitel a , tuate lak ah mi 13ten Jesu Khrist Lal leh Hondampa ding in hon sang thei ua, mi 15 vel dingte’n Pathian kiang a kilatthakna nei thei uhi. Pathian khasiangthou kithuahpihna toh camp lohching leh gahsuahtak in kizou thei hi. Hiai camp lohchinna ding a Satuam tuamtuam apan a huhna leh deihsakna thilpiak tuamtuam leh thumnate ziak ahihman in ka kipahna uh KTZ ah ka hon taklang uhi.

Thupina tengteng Toupa kia in tang hen! Amen.

- *Upa H Thianmuanthang, Secretary, TBUC*

EBCC, D. Leikot ■

Thutuamtuam

BOR-WELL BAWLZOH HITA:

Con v e n t i o n
English High
School Sinzawl
in tui haksatna
kumteng in
kituak a, school
leh siamsin



Hostel in tui kanlam chiang in tui zat ding kitasam in lei ngaisek a, kum khat mai in leng sum tampi sen ngai gige in hon buaisak zou mahmah sek hi. Hiai ka haksatna uh headquarters heututen theisiam in deihsakna thupi tak toh Bore-Well hon bawlsak ua, zoh ahitoh kiton in zattheih in omta hi, tui leng hoih mahmah hi. Hiai bang deihsakna ka tan uh kipaklua in KTZ tungtawn in kipahthu ka hon gen uhi.

- *Upa H Biaklal, Chairman, LSMC, CEHS Sinzawl*

KHALOH LAK MASAKPEN PIA:

Unaupa Mr. T Nengsuanlal s/o (L) T Kaizaneng leh Gouzaching EBCC Zion a om in CISF (GD) ah sepna muthak a, banah Unaupa Mr. T Suanminlian s/o (L) T Langkhogin in leng Assam Regiment (Agniveer) ah sepna muthak a amauten a khaloh lak masapen Local Saptuam, EBCC Zion ah kipahtugenna in pia uhi. A kipiakzohna uh thupi in etton tham ching kisa a, hiai tungtawn a kuaahiam in Pathian gam nasepna a pan a lakthakna honghieh ding lametna toh Khristian Thukizakna ah ka hon taklang uhi. Pathian in a sepna makaih in, ompih in, hong lamzang uhen chih ka thumna uh ahi.

- **Upa K Thangchinlian**, *Secretary, TBUC, EBCC Zion* ■

Dotna leh Dawnna

Dongtu: *P. Kamdouliau, EBCC Lungchin*

Dawngtu: *Rev Nenglian Vualnam, Director of Development, EBC*

Dotna: *Mathai 7:8- nu leh pa zahtak ding, it ding; Mathai 15:4- nu leh pa zahtak ding, it ding; Mathai 19:5- Nu leh pa paisan ding. Hiai atung ate hehpih in hon hihchian in. Khovel pian tung apan Nu leh Pa it ding, zahtak ding, thupi pen hi a, vualzawlha bulpi hi a, himahleh, Mathai 19:5 a lah zi leh ta neih chiang a Nu leh Pa paisan ding chizel, bang chidan hi hiam, A hithei tan in hon hihchian in aw, hehpihtak in.*

Dawnna: Bible in Nu leh Pa zahtak ding agente leh zi neih chiang a nu leh pa paisan ding agen a kikalh ahi kei. Mathai 19:5 a kigen, “*hiai ziaik in pasal in anu leh apa apaisan ding a, azi alen ding,*” kichi Gen. 2:24 apan kilasawn ahi. Pathian in huai thu agen lai in Adam leh Evi te'n nu hiam pa hiam anei kei uhi. Himahleh, nupate pumkhat ahong suah theihna ding ua Pathian thilgel ahi. Hiai a thumal paisan kichi in nuse vengveng a bangmah kizopna nei nawnlou ding chihna ahi kei. Amah panpihtu, koppih, dia Pathian piak azi toh pumkhat ahieh theihna ding ua azi a abelh (aletkip) theihna ding gen ahi zaw hi. Laisiangthou hihchiantu John MacArthur in mi'n zi aneih chiang in anu leh apa a zahtakna leh atung ua mohpuakna aneih teng beita chihna ahi kei a, huai nak sang in, mohpuakna thak leh athukzaw hong kibehlap ahi, achi hi (*The MacArthur Bible Commentary, 2005*). Huchi mah bang in, azi alen ding kichi in mohpuakna thak, huai tuh pumkhat suahna, kiselou a letkip tinten ding, belh bikbek ding, ahihdan agen hi. Huaiziakin, mi'n zi aneih chiang in anu leh apa azahtak ding, ban ah, atung ua mohpuakna aneih bangbang aseping sem lou tuanlou in azi toh pumkhat ahiehna uh alet tinten (abelh bikbek) ding ahi. Hiai thu in ki-intuan hiam, tuam ten hiam, chihte khen lampek ah kizopna dik Pathian deihdan ahon kawkmuh hi. Nupate pumkhat hihna suse thei ding zawng a midang kuamah akigolh louh ding ahi. ■



Ordain Sunna

1. Min: **UPA T THANGKHOCHIN**
 2. Pianni: March 01, 1950
 3. Pianna Khua: Savaipaih
 4. Pianthak Hun: August 17, 1971
 5. Baptisma tanni: 1971 ABM Makunda
Baptistu: Pastor Pramod Malakar
 6. Pa Min: (L) Pastor T Damkhotang
 7. Nu Min: (L) Niandon
 8. Zi min: Mrs. Nemzaniang
 9. Kitenni: September 18, 1980, Kitengsaktu: (L) Pastor Thangsut
 10. Gil a gah goutan neihzah: 4 Pasal: 3 Numei: 1
 11. Tu melmuh zah: 3
 12. Tulel a omna Saptuam: EBCC Vengnuam
 13. Tulel a kizatna: TBUC Member
 14. Ordain Kum: December 08, 2002
Ordain Petu: Rev L Kham Kho Lun
 15. Pahtakna lai san kum: Active
 16. Toupa kiang a tawldam ni: June 25, 2024, Vui ni: June 25, 2024
 17. Vuitu Pastor & Saptuam: Pastor H Biakson, EBCC Vengnuam
 18. Natna: Cancer
 19. Lai zilna toh kisai: Class X Pherzawl Govt. High School a zou, Churachandpur Govt. College a PUC zou, D.M College Imphal a BA zou
 20. *Sepna toh kisai:* Vangai Division a Accountant masapen ahi, ECC School Monglian a JB School a Headmaster sem hi, Gelzang CES ah Asst Headmaster 1982 in sem hi. ITI Language instructor in pang a huai apan in Punjab & Sind Bank ah Clerk nna sem in scale I officer in 2014 in pension hi.
 21. *Kizatkhakna leh nasep dang:* BCD leh BYF leh TBMCte ah member leh mohpuakna poimoh taktak 1974-1999 sung EBCC Tribal Colony ah pang hi, Calcutta a Zomi Fellowship ah leng Chairman hikha ngei hi. Dimapur ah leng saptuam a ding in active member leh local chairman bang in pang kha hi. Karbi Anglong Field Working Committee ah leng Chairman pokha hi. EBC Zion hong om un leng TMC chairman leh LSD DMC member leng hikha ngei hi.
 22. *A tanchin gelbeh:* Cancer natna bei a kitheih in lamka leh mun tuamtuan ah kikem in ki-enkol mah leh damsuaah zoulou in June 25, 2024 zinglam dak 4 vel ding in a nna a sep a muan Toupa kiang tawldam in a leitung khualzinna zou hi.
- Toupa Khasiangthou in a nutsiat a inkuan leh Saptuamte khamuan in makaih zelta hen.



1. Min: **UPA T. THANGKHANSONG**
2. Pianni: 1954
3. Pianna Khua: Lungchin
4. Pa Min: (L) Lamthawn
5. Nu Min: (L) Nu Goihvung
6. Zi min: Niansialching
7. Kitenni: 1980
8. Gil a gah goutan neihzah: 5 Pasal: 5
9. Tu melmuh zah: 9
10. Tulel a omna Saptuam: EBCC Vengnuam
11. Tulel a kizatna: TBUC Member
12. Ordain Kum: December 10, 1989 Ordain Petu: Rev.T. Jamkhotang
13. Pahtakna lai san kum: Active
14. Toupa kiang a tawldam ni: July 09, 2024 Vui ni: July 09, 2024
15. Vuitu Pastor & Saptuam: Pastor H Biakson, EBCC Vengnuam
16. Natna: Stroke



17. *A tanchin gelhbeh*: Amah, mi pianfel ahih dungzui in atup tangtun ngeingei tum mi ahi. A tangval lai in VVF kum tamtak ana pangkha hi. A tupte lak a khat tuh singtang a loukhou lou a nekmuh ding chih ahih dungzui in Damdawi zuak in hong kipan a, Damdawi zuakna lam ah mi giloute'n ana suam uhi. Damdawi zuak hong khawl in khedap bawl hong kipan in Police Station kong ah tu in a tate hon chawmtou a, a tate piching honsuah vek in, amau leh amau hong kitoudelh thei uhi. Kum 2019 kum in stroke in hong puk a, huai apan damlouna dang tuamtuamte toh inn ah ki-enkol den hi. Hatthei taktak tuanlou himahleh amah khom a, a omna mun a thoveng taka omthei zel chih lai in, July 08, 2024 zan nung in hongbuai a, Damdawi inn ah kipua hi. Honghoih dia lamet himahleh July 09, 2024 zinglam dak 10:30 vel in a nna a sep Toupa kiang ah khawltawldam ding in hong paisan hi.

Toupa Khasiangthou in a nutsiat a inkuan leh Saptuamte khamuan in makaih zelta hen. ■

EBC MUSIC RECORDING STUDIO TOH KISAI

EBC Recording Ministry (Studio) chiklai peuh a zattedih gige ahi. Saptuam vai a lakhum nuam, lasa nuam, thugen nuam, tangthu recording bawl nuam om leh chiklaipeuh in, a form fill-up a ngetna piaklut a khum theih ding a kimansa a omgige ahi. Saptuam mipi kuapeuhmah in zangmanphat sawmchiat ni.





Kipahthu Genna leh THUMNA DINGTE

AUGUST 2024

- 1 **NINGANI:** August kha hon musak Toupa tung ah kipah thu gen in a makaihna leh ompihna ngen in thum ni. August 1-4 sung NTBC Simveng in Hotdamna chialpi nei ding a, Evan T Damkothang thugenpi in pang ding. August 1-3 sung EBCC Vengnuam in BYF Camp nei ding a, Rev K Kamchinkhup, Director of Missions leh Evan T Damkothang thugenpi hiding, Pathian kha ompihna leh makaihna ngen in thumna ah phawk ni. EBCC Mawnglian BYF te saina in Solfa Training August 1-7, 2024 om ding a, hiai hun ah Mr Thangbiaklal Valte, Music Promoter EBC sinsaktu in pang ding a, thumna ah phawkni.
- 2 **SINTAWPNI:** August 2-4 sung EBCC Zion in Tualsung Missions Khawmpi zangding a, Evan Lianding Guite thugenpi in pang ding. Khawmpi lohching leh gahsuah ahihna ding in thumna ah phawk ni.
- 3 **KIGINNI:** August 4 in EBCC Tlanguam, Aizawl in Haithak lopna program zangding a, Rev Thawndoulian, Director of Ministries thugenpi in pangding. Program lohchingtak a zat ahihna ding in thumpih ni.
- 4 **NIPINI:** Saptuam School ten tukum a ding in Evangelistic Week zangzou chiat ta uh, khalam gah tampi lam-en ihihman in, Pathian kianga kipahthu genkawm in naupangte a ding in leh sinsaktute thumsak ni.
- 5 **SEPPATNI:** ORC Lamzang ah a vankim in pawltuamtuam in hun hongzang zel uh, kipahthu gen in, hiai mun enkoltu a om Mr. Suankhenmang te nupa taksa chidam na ding in thumpih ni. Huan hiai mun pen khalam a Toupa toh kituahna leh kipawlina mun poimoh a honghieh zomzelna ding in thum ni.
- 6 **SEPNAWNNI:** Dhemaji Missions Field a Field Superintendent Rev T Paununsang leh a seppihte ziak a Pathian kiang a kipahthu gen in, lohching leh gahsuah sem a honsep zel theihna ding un thumna ah phawk ni.
- 7 **NILAINI:** LRRC- Lametna Mun nasepna paihoih zel hi. Kibawltihak nuamte, khalam-salam hoih theipen a kep ahihzelna ding in leh hiai mun enkaitu, Upa T Langsanglian, Secretary leh a seppihte thumpih ni.
- 8 **NINGANI:** August 11 in Singngat Division in Mission Khawmpi, EBCC Singngat ah nei ding a, Rev

Thawndoulain, Director of Ministries thugenpi in pang ding, thumna ah phawk ni.

9 SINTAWPNI: August 10-11 sung EBCC Vengnuam in Nungzuihna Chialpi neiding a, Evan T Damkothang in Pathian thutak gending. Khrist nungzui muanhuai sekkhiak ahihna ding in thumpih ni. August 10 in BSI Churachandpur branch in Annual Khawmpi zang ding a, Rev Dr S Vung Minthang, GS in thugenna hunkhat zang ding, EBC Central Choir in Pathian phatna la sa ding, thumna ah phawk ni.

10 KIGINNI: August 10-11 sung Lamka South Dorka khawmpi omding a, Evan Lianding Guite thugenpi in pang ding. Khawmpi lohching leh gahsua ahihna ding in thumna ah phawk ni.

11 NIPINI: Bangalore a i saptuam gam a building kilamlei hoihtak a zoh ahih a, manphatak a zat ahihna ding in Pathian makaihna ngen in thum ni.

12 SEPPATNI: Kumnawn, 2025 Piching Nipi Skul sinlai ding, Ephesa laikhak hilhchetna Rev Nenglian Vualnam, Director, Development in bawl lel, Pathian ompihna leh makaihna toh hoihtak a hon zohna ding in thumna ah phawk ni.

13 SEPNAWNNI: August 14-18 sung EBCC Shillong in Piching Hotdamna Camp nei ding a, Evan T Damkothang thugenpi in pang ding. Camp lohching ahihna ding in thumpih ni.

14 NILAINI: August 14-16 sung EBCC Delhi in Tuailai Camp nei ding a, Evan Lianding Guite thugenpi in pang ding. August 15-18, 2024 sung EBCC College Veng in Music leh la toh kisai kisinsakna hun leh phatkhawmna hun zang ding uhi. Thangbiaklal Valte Music Promoter EBC in sinsak ding hi. August 15 IBWU thumna ni a Saptuam in zat hi ding. Hiai hunte lohching, manpha leh gahsuktak a zat ahihna ding in Pathian kha pawlna leh makaihna ngen in thumpih ni.

15 NINGANI: August 17-18 sung EBCC Central Lamka in Tualsung Missions Khawmpi zang ding a, Rev K Kamchinkhup, Director of Missions thugenpi in pang ding. Pathian ompihna leh makaihna ngen in thumpih ni.

16 SINTAWPNI: August 18 in EBCC Mualnuam in Haithak program zang ding a, Rev Thawndoulain, Director of Ministries thugenpi in pang ding, thumna ah phawk ni.

17 KIGINNI: August 18 in EBCC Songtal in Haithak lakkhawmna programme zang ding a, Rev Nenglian Vualnam, Director of Development in Pathianthu gen ding, thumna ah phawk ni.

18 NIPINI: Saptuam a Piching leh Naupang lam Nipi skul sinsaktute ziak a kipathu gen in, amauten Pathian deihna banga sinsakna honpiak zom zelnah theihna ding un thumpih ni.

19 SEPPATNI: Youth Co-ordinator in tuni tan in local BYF te vehna aneih paihoih thei zel, hiai vehna manpha leh lohching ahihna ding in leh maban a kalsuanna ding omlaite leng lamzangtak a apai theihna ding in thumpih ni.

20 SEPNAWNNI: August 21 in CEC tutkhawmna omnawn ding. Memberten Pathian dei hna banga Saptuam maban ding hon geel theih zelna ding un thumna ah phawk ni.

21 NILAINI: August 23-25 sung EBCC Lamka Baptist Church, Hiangtam Lamka in Nungzuihna Chialpi nei ding a, Rev K Kamchinkhup, DMs EBC in Pathianthu gen ding. Chialpi lohching ahihna ding in thumna ah phawk ni.

22 NINGANI: August 23-25 sung EBCC Hiangtam Lamka in Hun nanung chialpi nei ding a, Evan T Damkothang in Pathian thutak gen ding. Chialpi lohching ahihna ding in thumna ah phawk ni.

23 SINTAWPNI: August 23-26 sung EBCC Central Delhi in Bible Camp nei ding a, Evan Lianding Guite thugenpi hiding. Camp lohching ahihna ding in thumna ah phawk ni.

24 KIGINNI: August 24-25 sung EBCC Guwahati in departmental Orientation program zang ding a, Rev Nenglian Vualnam, Director of Development in thutak gen in sinsak ding. Program lohching leh manphatak a zoh ahihna ding in thumna ah phawk ni.

25 NIPINI: I saptuam a Evangeliste leh Co-ordinator te ziak a kipahtu gen in, amaute manpha leh gahsuah sem a hong kizat zomzel theihna ding un thumpih ni.

26 SEPPATNI: August 27-29 sung Music leaders camp, ORC ah om ding, manpha leh gahsuah tak a zat ahihna ding in thumna ah phawk ni.

27 SEPNAWNNI: August 28-31 sung MELC Headquarters saina in Upa Camp om ding a, Evan T Damkothang thugenpi in pang ding. Pathian kha pawlna ngen in thumpih ni.

28 NILAINI: Gam leh nam makaiten lungsim munkhat a pangkhawm a, ma hon kaih theihna ding un thumpih ni. Thilpiak petu ding leh thumtu ding Toupan hon behlapzel, kipahtu gen ni.

29 NINGANI: August 30- September 1, 2024 sung EBCC Pearsonmun in Nungzuihna Chialpi nei ding a, Rev K Kamchinkhup, Director of Missions thugenpi hiding, thumna ah phawk ni.

30 SINTAWPNI: Pathian louma a i seppih; WEC, SIM, IEM leh FMPBte ziak a kipahtu gen in, semtute a ding in Pathian kha thopna leh makaihna ngen in thum ni.

31 KIGINNI: Dorcas Hall, Division, Field Office leh tualsung Saptuam chih a sumsaitte ziak a kipahtu gen in, amaute Pathian ompihna toh fel leh kizentak a honsai zel theihna ding un thumpih ni. ■

Postal Regd. No. MNP 07 | Regd. No. 22344/70

BOOK POST

If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



Edited & Published by Rev. Dr. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006